

Lehenengo heriotza zigorrak ezarri dira Sarajevon gerra krimenengatik

Akusatuak bi soldadu serbiar ziren eta hilketa, bortxaketa eta bahiketa leporatu zizkieten

Sarajevoko Epaitegi Militarrek lehendabiziko bi kondena eman zituen atzo, Bosnia-Herzegovinako gerran eginiko gerra krimenen inguruan. Nazioarteko Epaitegia oraindik osatu gabe dagoenean, duela ia urtebete hasi zen gerra jasaten duten errepublikan ez diote itxaron nahi izan Nazio Batuen ekimenari.

SARAJEVO

Ez diote itxaron nahi izan, besteak beste, Bosniako serbiarrek bake plana onartu arte denbora asko iragan litekeelako, eta ondorioz, orain preso daudenak aske gera litezkeelako serbiarrek Sarajevo hartzea lortu orduko.

Soldadu serbiar bik heriotza zigorra jaso zuten atzo Sarajevon, hilketa, bortxaketa eta zibilen bahiketarengatik, Bosnia-Herzegovinan gerra krimenengatik egiten den lehendabiziko epaiketan. Errepublikan duela urtebete hasi zen gerra zibileko lehendabiziko kondenatuak 22 eta 31 urteko soldadu serbiar bi dira. Borislav Herak-ek, lehenak, 30 gerra preso eta zibil hil zituela eta 12 emakume gazte bortxatu eta hil zituela aitortu zuen. Bigarrenak, Sretko Damjanovic-ek, berriz, bost hilketa eta bi bortxaketa egin zituela onartu zuen, baina esan zuen aitortpena mehatxu eta kolpeak jasan ostean egin zuela. Bi errudunek 15 eguneko epea daukate apelatzeko, baina Heraken abokatuak ez du horrelakorik egingo, epaimahaiari jarritako kondena merezi zuela adierazi baitzion.

Herakek eginiko krimenez damututa zegoela adierazi zuen, eta horretara bere agintariek bultzatu zutela esan zuen, musulmanek emakume serbiarrekin gauza bera egingo zutela adieraziz. Gerra aurreko ohitura judizialari jarraituz, abokatuak eta fiskala akusatuen etnia berekoak ziren, hau da, serbiarrak.

«HERIOTZA ZIGORRA MEREZI DUT» «Heriotza zigorra merezi dut. Nire aita berriro ikusi eta zigarro batzuk besterik ez nituzke nahi orain» azaldu zuen Herakek epaia jakin ondoren. Gazte serbiarrak Sarajevoko inguruetan indar serbiarrek egindako garbiketa etnikoan parte hartu izana ere onartu zuen. Herakek epaimahaiari zenbait presori lepoa nola ireki zien erakutsi zion, eta parte hartu zuen 150 nekazariren hilketa nola gertatu zen kontatu.



30 pertsona hil eta 12 emakume bortxatu izana aitortu zuen Borislav Herakek.

AP

Zigor gehiago Belgraderi

BRUSSELA

David Owenek eta Cyrus Vancek eraturiko bake plana Bosniako serbiarrek onartzen ez badute Belgradeko Gobernuak zigor gehiago jaso beharko dituela ohartarazi zion atzo Belgikako atzerri ministroak Dobrica Cosici, Montenegro eta Serbiak osatzen duten Jugoslavia Berriko lehendakariari.

Willy Claes Belgikako Atzerri ministroa Jugoslaviako lehenda-

kariarekin bildu zen atzo Bruselan eta bake plana abian jartzeko Serbiak «betekizun funtsezkoa» duela gogorarazi zion Cosici. Izan ere, musulmanek eta kroaziarrek bake plana sinatu ostean Bosniako serbiarrak baino ez dira falta Jugoslavia ohirako errepublika horretarako bake egitasmoa onartzeko.

«Serbiatik iritsitako hegazkinenkin Srebrenicaren aurka berriki egindako bonbardaketak agerian uzten du Serbiak eta Montengrok

auzi honetan duten betebeharra», azpimarratu zuen Belgikako atzerri ministroak bileraren ostean kaleratutako ohar ofizialaren bidez.

Ildo honi jarraiki, nazioarteak eta bereziki Europako Komunitateak ezarriko dizkieten zigor ekonomikoak galerazi nahi badiotuzte Bosniako kideek plana sinatu eta betearaztea besterik ez dutela ohartarazi zion atzoko bileran Jugoslavia Berriko lehendakariari.

Su etena errespetatzen ari da oro har

BELGRAD

Laugarren eguna egin du gaur Bosniarako pasa den ostiralean hitzartu eta igandean indarrean sartu zen su etenak, eta atzo artean bederen errespetatu egin zen, Bosniako zenbait eskualdetan izandako eraso txikiak salbu.

«Ia urtebete gerra hasi zenetik ikusi ez dugun lasaitasunaz» aritu zen atzo Bosnia irrati egunero gerra parte ematen. Barry Frewer ere, Nazio Batuetako indarren bozeramailea, bat etorri zen adierazpen hauekin eta «su etena finkatzeko oraindik denbora falta den arren, oro har betetzen ari da» gehitu zuen.

Ildo honi jarraiki Phillipe Morillon Bosniako kasko urdinen buruzagiak gerra irtenbidean jartzeko aukera dela azpimarratu zuen herenegun. «Dagoneko abian den bakerako dinamika dago eta ez diogu aukera honi ihes egiterik utzi behar», zehaztu zuen buruzagi militar frantziarrak.

Igandeko goizeko 11.00etan indarrean jarri zen hitzarmeneko baldintzak gainera bete egin dira orain artean. «lehorretik pasabide bat eta airetik beste bat, ikuskatzaileak Bosnian barrena zabaltzea eta su etena errespetatzea izan ziren nik hitzartutakoak eta bete egin dira oraingo», gehitu zuen Morillonak.

TXURKIN ERRUSIARRA BELGRADEN

Vitali Txurkin Jugoslavia ohirako bake negoziaketetako bitartekari errusiarrak biziki garrantzitsua izan daitekeen bidaia egin zuen atzo Belgradera. Izen ere, Errusiak Bosniako gerran izan dezakeen jarra atzoko bileraren ondorioz has baidaitake argitzen.

Belgradeko iturri diplomatikoen arabera, Bosniarako bake plan alternatiboa ari da prestatzen aspaldidanik Errusia. Atzo Txurkinen ahokulariek esan zuten baina, Moskuko Gobernuak oraindik babesten du Vancek eta Owenek aurkeztutako bake plana.

Clintonek gehitu egingo du Ieltsini eman asmo dion laguntza

WASHINGTON

Errusiako Diputatuen IX. Kongresutik galtzaile nagusi gisa irten den arren, Boris Ieltsin lehendakariak ez du mendealdeko herrialdeen laguntza galduko, Makroparlamentuaren bilkuren ostean Europako Komunitateak, Estatu Batuek eta beste zenbait herrialdek jakinarazi dutenez.

Bill Clinton Errusiarako dirulaguntza aldatzea aztertzen ari da, Etxe Zuriak atzo kaleratutako berrien arabera. Washingtoneko Gobernuaren asmoek Errusian bizi den nahaste egoerari erantzuten diote, Moskuko Gobernuan alaketak izanez gero arrisku handia izango luketela uste baitute Washingtonen.

George Stephanopoulos Etxe Zuriko bozeramaileak herenegun iragarri zuenez, Washingtonek Moskuri eman asmo dizkion 700 milioiak ez dira Estatu Batuak eta Errusiaren arteko alde biko elkarlaguntzaren azkenekoak izango.

Bill Clinton eta Boris Ieltsin datorren asteburuan bilduko dira Kanadako Vancouver hirian, eta orduan izango da Estatu Batuek aurrerantzean Errusiarekiko izango duten jarraitaren xehetasun gehiago.

James Baker Estatu idazkari ohia bat etorri zen guztiz Clintonekin Gobernuaren alaketaren ostean emandako lehen elkarrizketan, eta lehendakaria «guztiz zuzena» dena egiten ari dela berretsi zuen. Bakerren arabera, Errusia da Estatu Batuak suntsitzeko gai den munduko herrialde bakarra eta Ieltsinen porrotak, beraz, arrisku handiak ekar lezarkioke Washingtoni.

JAPONIA ETA EK

Baina ez dira Estatu Batuak Errusiako Kongresuaren ostean Errusiari laguntza emango diotela berretsi duten herrialde bakarra. Egun Europako Komunitateko lehendakariak duen Danimarkak iritzi dionez, Europako merkaturak irekitzea da Errusiari eman diezaioketen laguntzarik onena eta ahalegin guzti honetan lagun dezaitez presio egingo die Europako Komunitateko kideei.